



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fatschendas:

BES 2010

Il cussagl ha tut invista dal stüdi BES 2010. Quel muossa in che direcziuns cha'l Bogn Engiadina Scuol as pudess sviluppar i'ls prossems ons. In quist connex vain eir discus scha' cumün as possa prestar a lunga vista trais bogns resp. in chenüna direcziun cha'ls bogns da Quadras e Trü as dessan sviluppar.

Disco in Trü

Il contrat culs fittadins actuals da la disco in Trü scrouda la fin d'avrigl. In quist connex discuta il cussagl cumünal scha üna disco in quel lö saja da mantgnair a lunga vista, siond cha la gestiun chaschuna adüna inavant disgusts cun disturbis da la quietezza nocturna. El vain però a la conclusiun ch'ün bsögn saja quia e cha la disco dess gnir mantgnüda per intant.

Scoula

In üna sezzüda cumünaivla han il cussagl cumünal e' cussagl da scoula discus differents temas:

- Applicaziun da la ledscha da pulizia, in prüma lingia quai chi riguarda giuvenils suot 16 ons chi füman o baivan alcohol.
- Avegnir da la scoulina e scoula rumantscha: in scoulina sun actualmaing be plü 35 % dals scolarins chi san rumantsch. Schi's less mantgnair a lunga vista la scoula rumantscha sun da far amo plü gronds sforzs per integrar linguisticamaing ils uffants da scoulina. Important es eir cha glied chi piglia domicil a Scuol sapcha ouravant cha la scoulina e la scoula sun manadas in rumantsch. Üna cumischiun cun rapreschantants dal cussagl cumünal, dal cussagl da scoula e da la magistraglia s'occupa cun quista tematica.

Ils dis da sport cun üna gronda varietà da sportas han gnü fich buns rebombs pro scolars e genituors.

Val Chalzina

L'uffizi forestal dal Grischun meridiunal ha elavurà ün preproget per repars in Val Chalzina. Dals cuosts totals ill'otezza da CHF 410'000.-- ha il cumün da surtour CHF 85'000.--. Il cussagl cumünal ha deliberà quist preproget per ch'el possa gnir inoltrà al Chantun ed a la Confederaziun pellas subvenziuns.

Concept da trafic

Pel quartier Sotchà-Pütvia sun avant man ideas per üna surfabricaziun plü gronda. In vista a quist intent ed eir in general han las giuntas da planisaziun e da trafic tut suot ögl il concept da trafic chi'd es gnü elavurà in connex culla revisiun da la planisaziun. I s'ha muossà cha quist concept correspuonda amo adüna als böts e cha tschertas masüras füssan da realisar il plü svelt pussibel (p.ex. tempo 60 km/h sülla via da sviamaint, taxas da parcar in tuot il cumün ed üna zona d'inscunter cun sveltezza maximala da 20 km/h sül Stradun tanter l'hotel Belvédère e'l spartavias da Clozza).

Inscunter Hemsin

Il cumün da Scuol ha contact cun ün cumün i'l nord da la Tüurchia, Hemsin, chi's less sviluppar sco cumün turistic e profitar per quist scopo da las experienzas da Scuol. Dürant ün'eivna in favrer es statta üna delegaziun da Hemsin a Scuol per discussiuns e visitas oclaras i'l sector dal turissem, da l'infrastructura cumünala, da l'agricultura ed oter plü. Ils giasts türchs sun stats fich cuntaints, ed eir pel cussagl cumünal esa stat ün inscunter interessant.

Collavuraziun da las giuntas

In seguit ad üna sezzüda insembel culla giunta da planisaziun ha il cussagl decis cha la giunta possa gnir consultada illa procedura da plan da quartier, quai impustüt pro cas chi pudessan dar andit a controversas, p.ex. pervi da la grondezza d'ün stabilimaint obain ün lö expost.

Il Stradun dvainta via cumünala

Als 31 marz 2008 surpiglia il cumün il Stradun chi d'eira fin uossa üna via chantunala. Il cumün sclerischa cul uffizi da construcziun bassa che lavuors chi sun amo da far a cuosts dal Chantun.

EE-Energia Engiadina

La cumischiun da l'EE s'ha dedichada a la pussibilità da realisar ün proget d'ün'ouvra electrica nouva tanter la centrala actuala da la Clemgia ed il sboccamaint da la Clemgia i'l En suot Chasellas. I's tratta dad ün dischlivel da ca. 24 meters.

Illa sezzüda dals delegats da la corporaziun dals cumüns concessiunaris es gnüda tematisada la dumonda scha'l cumün da Scuol saja pront da transfuomar la EE in üna società d'acziun o üna corporaziun da dret public da maniera cha'ls oters cumüns as pudessan eir participar landervia.

Jeantex Bike Transalp

Als 21/22 lügl es Scuol darcheu lö d'etappa pel Jeantex Bike Transalp, üna cuorsa da velos da plüs dis. Ils curriduors rivan darcheu vers saira aint il böt giò'n Büglgrond/Plaz e partan là il di davo. Ils abitants pertocs vegnan orientats a temp ütil davart impedimaints da trafic.